

**Kalaallit Nunaanni eqqartuussisarnermik inatsisip, Kalaallit Nunaanni pinerluttulerinermi inatsisip, qularnaveequsiisarneq pillugu Kalaallit Nunaannut inatsisip aamma aappariinnerup inatsisitigut sunniuteqarnera pillugu inatsisip Kalaallit Nunaannut atuutilersinneqarsimasup allanngortinneqarneri pillugit inatsimmut missingiutip (Eqqartuussivinnut 2024-imiit 27 ilanngullugu ukiunut arlalinnut isumaqatigiissutip ilaanik naammassinnineq) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartunut aalajangiiffigisassatut siunnersuut**

*Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisumit saqqummiunneqartoq*

**pillugu**

**Inatsisinut Ataatsimiititaliap**

**siunnersuutip aappassaaneerneqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, siulittaasoq  
Inatsisartunut ilaasortaq Aqqalu C. Jerimiassen, Atassut, siulittaasup tullia  
Inatsisartunut ilaasortaq Adam Kristensen, Inuit Ataqtigiit  
Inatsisartunut ilaasortaq Juliane Enoksen, Inuit Ataqtigiit  
Inatsisartunut ilaasortaq Kuno Fencker, Siumut

UKA2024-mi ulloq 1. oktoberimi siullermeerinninnerup kingorna ataatsimiititaliap inatsisissatut siunnersuut misissorpaa.

**Siunnersuutip imarisaa siunertaalu**

Eqqartuussiviit aningaasaqarnerannut isumaqatigiissummit suliniutit ilaasa Kalaallit Nunaannut tunngassuteqartut piviusunngortinneqarnissaannut pisariaqartinneqartumik inatsisit allanngortinneqarnissaasa naammassineqarnissaat siunertaralugu inatsisissatut siunnersuut suliarineqarpoq.

Inatsisissatut siunnersuummi siullertut Nunatta Eqqartuussisuuneqarfiani nunap eqqartuussisuuneratut atorfiit amerlineqarnissaat siunniunneqarpoq, taamaalilluni Nunatta Eqqartuussisuuneqarfiani nunap eqqartuussisuunera ataasiinnaajunnaarluni nunap

eqqartuussisuuneratut atorfiit marlungortinneqassallutik. Tassunga atatillugu nunap eqqartuussisuunerisa qullersaata eqqartuussisarnermi suliassat ullumikkut nunap eqqartuussisuuneranit ingerlanneqartartut aammalu eqqartuussinermi suliap aalajangersimasumik aalajangiivigineqarnissaannut tunngassuteqanngitsut ingerlatissagai siunnersuutigineqarpoq.

Aappaattut Danmarkimi atuuttut assigalugit eqqartuussisumik soraarninngorsimasumik atorfimmi piffissami aalajangersimasumik atuuttumi eqqartuussisutut sulinissamut aggersaanissamut periarfissap atuutsinneqalernissaa siunniunneqarpoq.

Pingajuattut eqqartuunneqartussanut illersuisunut ataqatigiissaarisumik suliassanik Kalaallit Nunaanni illersuisunik ilinniartitsinermut, siunnersuineranut atorfinitsitsinermullu attuumassuteqartunik isumaginnittussamik inatsisinik atuutsitsinermut ministerip toqqaasinnaanissaa siunniunneqarpoq. Aalajangersakkatut siunnersuutigineqartup eqqartuunneqartussanut illersuisunut ataqatigiissaarisup eqqartuunneqartussanut illersuisunik atorfinitsitsinissamut inatsisinik atuutsitsinermut ministerimit piginnaatinneqarsinnaaneranut kiisalu eqqartuunneqartussanut illersuisunut ataqatigiissaarisumut il.il. aaqqissuussinermik pilersitsinissamut ataatsimut piginnaatitsissummik atuutsitsilersinnaaneranut inatsisitigut tunngavissamik pisariaqartinneqartumik qulakkeerivigissavaa.

Sisamaattut Kalaallit Nunaanni nalunaarsuineramik suliaqarnerup (eqqartuussivikkoortumik nalunaarsuinerup) qarasaasiatigut ingerlanneqalernissaanut inatsisit pisariaqartinneqartumik allanngortinneqarnissaat siunniunneqarpoq. Pisinnaatitaaffiit sorliit nalunaarsorneqarsinnaanersut imaluunniit nalunaarsuinerup nalunaarsuisitsinnginnerulluunniit inatsisitigut sunniutissaannik allannguisoqarnissaa aallaaviatigut siunnersuutigineqanngilaq.

Eqqartuussivikkoortumik nalunaarsuinerup qarasaasiatigut ingerlanneqalernissaanik siunnersuutip nassatarissaavaa nalunaarsuineramik suliaqarneq (eqqartuussivikkoortumik nalunaarsuineq) Nunatsinni Eqqartuussivimmit suli isumagineqassamat, imaalilluguli nalunaarsuineq Tinglysningsretimit qarasaasiatigut ikorfartorneqarluni aammalu imaalillugu isumaqatigiinngissutit pillugit aalajangiisoqartussaatinagu, Nunatsinni Eqqartuussivimmi eqqartuussisut qullersaata Tinglysningsretimi sulisut nalunaarsuinissamik suliap suliarineqarnissaannik piginnatissinnaagai.

Kalaallit Nunaanni eqqartuussivikkoortumik nalunaarsuinerami periuseq pillugu malittarisassat erseqqinnerusut inatsisinik atuutsitsinermut ministerimit nalunaarutikkut aalajangersarneqarnissaat siunniunneqarpoq.

Kiisalu inuit akornanni saqitsaannermik suliani qarasaasiatigut attaveqatigiinnerup siunissami atorneqarsinnaaneranut inatsisissatut siunnersuutikkut tunngavissiiisoqarpoq, taamaaliornissamut teknikikkut periarfissat Kalaallit Nunaanni eqqartuussivinni

pissarsiarineqarpata. Oqaatigineqassaaq teknikikut periarfissat taamaaliornissamut pissarsiarineqarpata pinerluttulerinermik suliani qarasaasiatigut attaveqatigiinnerup atorneqarnissaanut eqqartuussisarnermik inatsit pisariaqartinneqartumik tunngavissamik imaqaareemat.

Inatsisip ulloq 1. marts 2025-mi atuutilersinneqarnissaa siunnersuutigineqarpoq. Inatsisinilli atuutsitsinermit ministeri inatsimmi § 1, nr. 5-ip, § 3-p aamma § 4-p (eqqartuussivikkoortumik qarasaasiatigut nalunaarsuineq) atuutilersinneqarnissaanut piffissamik aalajangersaasinnaavoq.

### **Siunnersuutip Inatsisartunit siullermeerneqarnera**

Eqqartuussivikkoortumik qarasaasiatigut nalunaarsuinerup atorneqalerneranut atatillugu eqqartuussivikkoortumik nalunaarsueriaatsimik atuinermi kalaallit oqaasiisa atorneqarnissaanut aamma periarfissaqalernissaa qulakkeerneqassasq erseqqissaatigineqarpoq.

Taamatuttaaq inatsisissatut siunnersuutip kalaallisua oqaatsitigut inaarutaasumik saqqummertussami iluarsineqartariaqartunik amigaateqartoq uparuarneqarpoq.

Eqqartuussivinni atorfiit amerlineqarnissaannik siunnersuut 2027-ip kingorna atorunnaassanersut aamma apeqqutigineqarpoq.

Tassunga atatillugu Inuussutissarsiornermut, Niuernermit, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq paasissutissiivoq eqqartuussivikkoortumik qarasaasiatigut nalunaarsueriaatsip nutaap kalaallit oqaasii atorlugit atorneqarsinnaanissaa Naalakkersuisunit piumasaqaataasq, inatsisissatut siunnersuummi oqaatsitigut amigaataasut iluarsineqassasut aammalu eqqartuussivinni atorfiit amerlineqarnerat 2027-ip kingorna atuukkunnassanngitsoq ataavartuussasorli.

### **Tusarniaanermut akissutit**

Tusarniaaneq inatsisinik atuutsitsinermit ministereqarfimmit ingerlanneqarpoq, tamatumani Kalaallit Nunaanni oqartussat kattuffiillu il.il. susasaqartut peqataatinneqarlutik. Siunnersuut piffissami 2024-mi ulloq 2. julimit ulloq 30. julip tungaanut tusarniutigineqarpoq kiisalu Danmarkimi tusarniaanernut nittartakkami tamanut saqqummiunneqarluni. Tamatumalu saniatigut siunnersuut Folketingip Kalaallit Nunaanut tunngasunut ataatsimiititaliaanut aammalu Folketingip eqqartuussiveqarnermut ataatsimiititaliaanut ilisimatitsissutitut nassiunneqarpoq.

### **Ataatsimiititaliap siunnersuummik suliarinninnera**

Aalajangiiffigisassatut siunnersuut ataatsimiititaliamit tamakkiisumik tapersernejarpoq, pissutsit naapertorlugit eqqartuussiveqarnerup aningaasanik sulisunillu amerlanerusunik pilersorneqarnissaa pisariaqartutut isigineqartariaqarmat. Tassunga atatillugu pingaartumik Nunatta Eqqartuussisuuneqarfiani nunap eqqartuussisuuneratut atorfiit amerlineqarnissaat, eqqartunneqartussanut illersuisunut ataqatigiissaarisumik toqqaasoqarnissaanik siunniussisoqarnera aammalu qarasaasiakkut aaqqiissutissat atorneqarnerulerneqarnissaannut inatsisitigut tunngavissiortoqarnera ataatsimiititaliamit tapersernejarput.

Eqqartuussivikkoortumik qarasaasiatigut nalunaarsuinerup atorneqalerneranut atatillugu eqqartuussivikkoortumik nalunaarsueriaatsimik atuinermi kalaallit oqaasiisa atorneqarsinnaanissaat ataatsimiititaliamit pingaartinneqarpoq. Tassunga atatillugu periutsip kalaallisuuata, periutsip piviusunngortinneqarnissaanut kinguarsaataangitsumik, ineriartortinneqarnissaa ataatsimiititaliamit pingaartinneqarpoq.

### **Siunnersuutip aningaasaqarnikkut kingunerisassai**

Aalajangiiffigisassatut siunnersuutip piviusunngortinneqarnerani aningaasaqarnikkut allaffissornikkullu kingunerisassat siunnersuutip tunngavilersuutitaani nassuiaatigineqartassasut Inatsisartut suleriaasianni § 33, imm. 1-imi allassimavoq.

Tamanna naapertorlugu siunnersuutip piviusunngortinneqarnerani aningaasaqarnikkut kingunerisassat siunnersuummi taamaalilluni allassimasut ataatsimiititaliamit maluginiarneqarpoq.

### **Pisortanut aningaasaqarnikkut allaffissornikkullu kingunerisassai**

Eqqartuussivinnut ukiunut arlalinnut isumaqatigiissummi suliniutit inatsisissatut siunnersuut malillugu ingerlanneqassapput, tamatumani piffissami 2024-mit 2027-mut piviusunngortitsinissamat aningaasartuutit, eqqartuussivikkoortumik qarasaasiatigut nalunaarsuisalernerum, Nunatta Eqqartuussisuuneqarfiani atorfiit amerlineqarnerannut aammalu illersuisunut ataqatigiissaarisumik pilersitsinermut atatinneqarsinnaasut, 10 mio. kr.-iusussatut nalilerneqarlutik.

### **Namminersorlutik inuussutissarsiutilinnut aningaasaqarnikkut allaffissornikkullu kingunerisassai**

Eqqartuussivikkoortumik qarasaasiatigut nalunaarsuisalernikkut piffissap sulianik ingerlatsinermut atorneqartartup sivikillineratigut allaffissornikkut oqilisaataassaaq.

### **Innuttaasunut aningaasaqarnikkut allaffissornikkullu kingunerisassai**

Eqqartuussivikkoortumik qarasaasiatigut nalunaarsuisalernikkut piffissap sulianik ingerlatsinermut atorneqartartup sivikillineratigut allaffissornikkut oqilisaataassaaq. Tamatuma

saniatigut Nunatta Eqqartuussisuuneqarfiani sulisut amerlinerisigut piffissap sulianik ingerlatsinermut atorneqartartup sivikillineranik tamanna nassataqarsinnaasariaqarpoq.

Kalaallit Nunaanni illersuisunut ataqatigiissaarisooqalernerata innuttaasut tarnikkut nappaatilittut katsorsarneqarnissamik imaluunniit isertitsivimmiittussanngortinneqarlutik eqqartuunneqartut eqqortumik ikiorneqarnissamut pitsaaneruseqarpoq periarfissaqalersissavai.

### **Naligiimmik pinninnissamut tunngasutillugu kingunerisassai**

Soqanngilaq.

### **Ataatsimiititaliap inassuteqaatai**

- *Tamanna tunngavigalugu aalajangiiffigisassatut siunnersuut akuerineqassasoq ataatsimiititaliamit isumaqatigiittumit inassutigineqarpoq.*

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Anders Olsen  
Siulittaasoq

---

Aqqalu C. Jerimiassen  
Siulittaasup tullia

---

Adam Kristensen

---

Juliane Enoksen

---

Kuno Fencker